

晚
晴
移
詩
匯

晚晴簃詩匯卷一百二十五目錄

林則徐 三十首

程恩澤 八首

蔣立鏞 一首

徐謙 三首

黃玉衡 六首

馮元錫 一首

湯儲璠 八首

李彥章 八首

朱王林 三首

王贈芳 一首

楊兆璜 二首

廖文錦 三首

劉珊 四首

饒漢 三首

王衍梅 四首

林元英 一首

尹作翰 一首

吳衡照 九首

鮑廷博 二首

曹宗翰 二首

邵淵耀 三首

楊庚 三首

德宣 二首

梁元 三首

管貽莊 一首

陳僅 二首

王蔭槐 八首

曹元詢 四首

楊昌光 一首

尹尙廉 二首

劉廣禮 一首

王夢庚 九首

史密 一首

閔新 一首

汪漱芳 三首

洪震烜 一首

孫成彥 一首

晚晴移詩匯卷一百二十五

徐世昌

林則徐字元撫一字少穆侯官人嘉慶辛未進士改庶

吉士授編修官至雲貴總督加太子太保贈太子太

傅諡文忠有雲左山房詩鈔

詩話文忠經世之才餘事爲詩緣情賦物靡不裁量
精到中邊俱澈卓識闕論亦時流露其間非尋常詩
人所及謫戍後諸作尤排側深厚有憂國之心而無
怨誹之跡當時好事者合公與鄧嶰筠制軍之詩轉
爲林鄧唱和集工力相敵並稱傳作公自有句云他
日韓非慳共傳卽今彌勒笑同龕又云白頭到此同
休戚青史憑誰定是非歷代名
臣遷謫罕觀此風雅盛軌也

答陳恭甫前輩壽祺

昨枉雙鯉魚發緘得贈言獎借逮末學譽揚及家尊更慨
吏道媮期以古處敦樹立尙宏毅一語誠探原嗚呼利祿

徒字氓何少恩所習乃脂韋所志在飽溫色厲實內荏驕
畫而乞昏豈其魁才智適以資攀援模稜計滋巧刀筆文
滋繁峻或過申商滑乃踰衍髡牧羊既使虎嚇鼠徒驚鷓
有慾剛則無此際伏病根於傳戒焚象於詩勵懸狙要在
持守固庶幾惻隱存知人仰聖哲弊吏扶元元舉錯愜輿
論激濁澄其源側聞官方敘馴致民物蕃不才乏報稱循
省慙素飧但當保涓潔弗逐流波奔三復吉人詞清夜心
自捫

題王竹嶼都轉黃河歸懼圖

事君宜致身引疾似詭避要其心迹殊賢愚詎同致或憚
遠役勞或畏瘠土累或遭上官怒或慮吏議至其名爲勇
退其心實巧利亦有止足懷投老初衣遂泉石祇自高那

問經世事此皆非君倫君退蓋以義傳家裕經術夙志在
用世治績越中彰姓名御屏記一擢二千石再擢觀風使
河朔黃流長安瀾歲歷四人言君砥柱允副宣房寄誰知
蓋臣心幽獨自難昧嗚呼習移人其在河隄吏縱諸三策
施孰詰百端僞明察疑煩苛獨清亦衆忌和光同其塵又
豈志士志聞君立河壩暗灑憂時淚督役稽芻茭廢食不
假寐以此勞心神乃夢豎子二周任訓陳力敢謂可卧治
亟謀攝衛宜以作報稱地吏民徒苦留歸榜疾於騎河心
咽清流嵩少送煙翠片帆收白門但有琴書載老屋餘劫
灰小山上叢桂無田歸亦得奚用江水誓九重側席殷艱
難待宏濟詎許卧煙霞正資振凋瘵朝出夕拜官除書破
常例離綱重江淮上關軍國計積疲幾淪胥盤錯要利器

前席咨嘉謨指陳切時弊權知卽真除匪以汝爲試責效
匪在速謀遠庶可繼單車昨南來先聲動懷畏人皆爲君
榮我聞竊心繫防河固良難煮海詎云易所賴本清直兼
能運才智苟當改絃張斷制必剛毅人情多媿要願勿徇
浮議上策探本原補救特其次要知君所爲定與末流異
我昔亦移疾自分宜放棄聖慈曲體之感極但零涕與君
語進退使我重獻歛庶持激厲心十駕勉追驥

驛馬行

有馬有馬官所司絆之欲動不忍騎骨立皮乾死灰色那
得控縱施鞭箠生初豈乏颯爽姿可憐郵傳長奔馳昨日
甫從異縣至至今不得辭韁轡曾被朝廷衆養恩筋力雖
憊奚敢言所嗟飢腸轉轉祇有血淚相和吞側聞駕曹

重考牧帑給芻錢廩供菽可憐虛耗大官糧盡飽閑人圍
人腹況復馬草民所輸徵草不已草價俱廐閒槽空食有
幾徒以微畜勤縣符吁嗟乎官道天寒齧霜雪昔日蘭筋
今日裂臨風也擬一悲嘶生命不齊向誰說君不見太行
神驥鹽車驅立仗無聲三品芻

病馬行

生駒不合烙官印服阜乘黃氣先盡千金一骨死乃知生
前誰解憐神駿不令鏖戰臨沙場長年驛路疲風霜早知
局促顛連有一死恨不突陣衝鋒裹血創夜寒廐空月色
黑強起哀鳴苦無力昔飢求芻恐不得今縱得芻那能食
圉人怒睨目猶側欲賣死皮償酒直馬今垂死告圉人爾
之今日吾前身

沅兩君歌

此月集言臣卷一 下 二 二 五

三

沅州官長多宿儒就中雙絕天下無
歸然藍翁賢大夫起家禁近官中書
二十六科誰與俱省郎今盡前輩呼
乾隆之間大郡除卅年仍羈銅虎符
抱九仙骨何清臞耳聰眸瞭行且趨

凡石太守乾隆乙酉舉於鄉已丑登中書科

典史之職誠區區誰其

任者蔣賓隅蚤登乙科文譽都手編縣譜墨綬紆偶蹶不樂人持扶一命亦濟奚卑污樹蘭千叢梅百株以吏爲隱

詩爲娛

蔣典史戊申登賢書

我來楚南停輶車一時投契苔岑如兩

賢官守崇庠殊要以同志道不孤藍翁於我爲扮榆漳江之湄翁故廬詩人山澗今云徂鹿洲一集體用儲黃籍雖遷業不渝翁能繼之恢遠謨我有同舟延陵吳亦與蔣侯同閨閭時作吳語聆吳歛鄉心儻亦思葦鱸此間歡會平

生逾卻憶所歷增歛歔豈無傾蓋臨交衢致身往往非一
途轉喉時防笑我迂頗聞同官亦齟齬道不相謀冰炭居
才人蛺蝶名士鶴祇合學隱隨蜘蛛聚星在此吾不圖協
恭相勵皆廉隅山城磽确非膏腴厚培民氣須吾徒昔日
瘡痍今袴襦苗蠻讐慄閭閻蘇獨惜難留大令盧清聲萬
口徒嗟吁盧明府爾秋幸芷江有聲安得公等連茅茹盡致尊顯經綸
敷勿使人嗤儒術疏

題秦琴山同年

鳳藻滇華五芝圖劉寄庵先生選五

和李卽園於陽雲州楊丹山國翰呈貢戴古邨潛
昆明戴雲帆恩詔楚雄池藥庭生春古邨絕意仕
進矣已卯秋試余司文柄國子皆獲雋又先後皆
出琴山門琴山繪圖誌盛屬余賦之

使君導我滇山麓珍翠文犀看不足五芝聞在五華巔足
繭隨君躡幽谷一芝蹇卧雲外峯四芝采采歸筠籠靈根

且日集言 卷之一 下 二 三
未許落凡手合種君門爲君有人問豔說桃李花君能識
拔超煙霞人間豈少芙蓉怨君爲披尋出塵溷與君臭味
眞苔岑攀芳擷秀同一心願芝日共琅玕長祝芝永作金
石音憶昔仙人種瑤草十年恐委荒山道呼龍耕煙鶴守
雲苦心調護天爲老憑君拾取貢瑤京應使仙人笑絕倒
彼隱士兮如可招我詩欲寄商山皓

題文信國與趙青山兩札後

公身爲國輕生死綵綵故人尙如此薄君君之幕僚耳聞
疾乃如疾在己磨盾手揮書兩紙刀圭欲救膏肓起行府
篝鐙遣醫視二卒六夫任所使棉定奇溫覆以被芝楮五
百實其匭是時景炎歲丙子冬夜寒風徹肌髓書馳負簪
八十里蒲君病在雙谿閣下期來止吁嗟乎天水皇綱勢

終靡一木難支大厦圯風雨何從庇寒土薄君薄君長已
矣三百壙甄公所彞崇慶寺前舜卿誅宿草蕭蕭成戰壘
此札人間獨不毀墨花吐豔雲凝紫再拜薰香皮斐几欲
廢一部十七史朱鳥招魂淚如泚獵獵酸風滿柴市

中秋懈筠尙書招余及關滋圃軍門

天培

飲沙角礮

臺眺月有作

坡公渡海誇羅浮涼天佳月皆中秋鐵橋石柱我未到黃
灣胥口先句留今夕何夕正三五晴光如此胡不游南陽
尙書清興發約我載酒同扁舟日午潮回櫂東指順流一
葦如輕鷗鼓柁健兒好身手二十四槳可少休轉眸已失
大小虎須與沙角風颿收是時戰艦多貔貅相隨大樹驅
蚍蜉礮聲裂山雜鼓角檣影蘸水揚旌旆樓船將軍肅鈴

律雲臺主帥精運籌大宣皇威震四裔彼伏其罪吾乃柔
軍中歡讌豈兒戲此際正復參機謀行酒東臺對落日猶
如火繖張鬱攸莫疑秋暑酷於夏晚涼會有風颺颺少焉
雲斂金波流夜潮洶湧拋珠毬涵空一白十萬頃淨洗素
練懸滄洲三山倒影入海底玉宇隱現開瓊樓乘槎我欲
凌女牛舉杯邀月與月酬霓裳曲記大羅詠廣寒斧是前
身修試陟峯巔看霄漢銀河瀉露洗我頭森森寒芒動星
斗光射龍穴龍爲愁蠻煙一掃海如鏡清氣長此留炎州
三人不假影爲伴袁宏庾亮皆吾儔醉歸踏月涼似水仍
屏廉從祛鳴騶褰簾拂枕月隨入殘宵旅夢皆清幽今年
此夕銷百憂明年此夕相對不留詩準備別後憶事定吾
欲歸田疇

華陰令姜海珊招游華山

神君管領金天嶽坐對三峯看未足公餘喜共客登臨恰
我西行來不速櫻筍廚開浴佛時暫輟放衙事休沐灑靈
宮殿訪碑行清白圍林對牀宿凌晨天氣半陰晴晝永無
煩宵秉燭竹杖芒屨結儔侶酒榼茶鐺付僮僕雲夢觀裏
約乘雲玉泉院中聞漱玉同儕各挾濟勝具初陟坡陀踵
相續嶂疊峯迴路忽窮誰料重關在山曲微徑蜿蜒蝮旋
磨絕磴攀躋鮎上竹箭鏃依稀王猛臺丹砂隱現張超谷
莎蘿坪與青柯坪小憩聊尋道書讀過此巉巖愈危絕鐵
鎖高垂手難觸五千仞峻徒窘步十八盤經猶駭目恨無
謝朓驚人詩恐學昌黎絕頂哭游人到此怪山靈奇險逼
人何太酷豈知山更怪人頑無端蹴踏穿其腹茲山峭拔

本天成但以骨挺不以肉呼吸眞教帝座通避趨一任人間俗如君超詣迴出塵上感嶽神造民福盪胸自有層雲生秀語豈徒奪山綠希夷石峽應重開海蟾仙菴亦堪築獨慚塞外荷戈人何日陰崖結茅屋惟期歸馬此山陽遙聽封人上三祝

壬寅臘月十九日嶰筠前輩招諸同人集雙硯齋作坡公生日此會在伊江得未曾有詩以紀之

中原俎豆不足奇請公乘雲游四夷天西絕塞招靈旗下有荷戈之人頂禮之公生距今八百有七載元精在天仍爲牛斗箕命宮磨蠍豈公獨春夢都似黃梁炊粟荒天遺作箕子此語足壯羈臣羈當時天水幅員窄瓊雷地已窮邊陲天低鶻沒山一髮祇在海南秋水湄豈如皇輿西控二萬

里烏孫突厥悉隸吾藩籬若將壯游較今昔恐公猶恨未
得周天涯崆峒之西公所夢恍見小有通仇池導公神游
合西笑何必南飛載鶴尋九疑所嗟公身屢徙復遭屏官
屋欲傲猶阻於有司合江之樓白鶴觀居此新宅無多時
寄身枕椰啖蘋芋南冠九死真瀕危吾儕今猶託代舍憶
公倍感皇天慈謫所一生過也得公言曠達真吾師南陽
詞人涓玉卮鞠脰先製神絃詞懸公大瓢笠屐之遺像誦
公羅浮儻耳之新詩公神肯來古伊麗白鹿可誇青牛騎
冰嶺之冰雪山雪照公堂堂出岷嶓長松塵洗鶴意遠真
有番樂來龜茲試著紫裘腰笛臨風吹使公空中一笑掀
髯髭

庚子歲暮雜感

病骨悲殘歲歸心落暮潮正聞烽火急休道海門遙
蜃市連雲幻鯨濤挾雨驕舊慚持漢節才薄負中朝

此涕誰爲設多慚父老情長紅花盡嬾大白酒先傾
早悟雞蟲失毋勞燕蝠爭君看滄海使頻歲幾回更

幸飲修仁水曾無陸賈裝通江知蒟醬擲井憶沈香
魁結終無賴羈縻或有方茹茶心事苦愧爾頌甘棠

朝漢荒臺古登臨百感生能開三面壘孰據萬人城
揚僕空橫海終軍漫請纓南溟去天遠重鎮要威名

次韻答宗滌樓稷辰贈行

豈爲一身惜將如時事何綢繆空牖戶涓滴已江河
軍盡驚飛竊人能議止戈華嚴誦千偈信否伏狂魔

昨枉瓊瑤雜馳情到雪山投荒非我獨尋夢爲君還
但視

中原靖矣辭絕塞艱隻身萬里外休戚總相關

河內弔王谿生

江湖天地兩淪虛黨事鉤連有謗書偶被乘鸞秦贅誤詎
因羅雀翟門疏郎君東閣驕行馬後輩西崑學祭魚畢竟
浣花真髓在論詩休道八叉如

湯陰謁岳忠武祠

不爲君王忌兩宮權臣敢撓將臣功黃龍未飲心徒赤白
馬難遮血已紅尺土臨安高枕計大軍河朔撼山空靈旗
故土歸來後祠廟猶嚴草木風

壬寅二月祥符河復仍由河干遣戍伊犁蒲城相國
涕泣爲別愧無以慰其意呈詩二首

幸瞻鉅手挽銀河休爲羈臣悵荷戈精衛原知填海誤蚊

蝨早愧負山多西行有夢隨丹漆東望何人問斧柯塞馬
未堪論得失相公且莫涕滂沱

元老憂時鬢已霜吾衰亦感髮蒼蒼餘生豈惜投豺虎羣
策當思制犬羊人事如棋揮不定君恩每飯總難忘公身
幸保千鈞重寶劍還期賜尙方

將出玉關得嶢筠前輩自伊犁來書賦此卻寄

與公蹤跡靳從驂絕塞仍期促膝談他日韓非慚共傳卽
今彌勒笑同龕揚沙瀚海行猶滯齧雪穹廬味早諳知是
曠懷能作達只愁烽火照江南

公比鰕生長十年鬢鬚猶喜未皤然細書想見眸雙炯故
紙難拋手一編僦屋先教煩次道攜兒也許學斜川中原
果得銷金革兩叟何妨老戍邊

哭故相王文恪公

纔錫元圭告禹功，公歸遵渚詠飛鴻。
休休豈屑爭他技，蹇蹇俄驚失匪躬。
下馬有墳悲董相，隻雞無路奠橋公。
傷心知己千行淚，灑向平沙大幕風。

廿載樞機贊畫深，獨悲時事涕難禁。
禁艱屯誰是舟，同濟獻替其如突不黔。
衛史遺言成永憾，晉卿祈死豈初心。
黃扉問道猶虛席，一鑑云亡未易任。

解筠贈鶴

不慕高軒足俸錢，卻教羈客飼胎仙。
銜書愛近烏絲格，起舞因聽雁柱絃。
萬里倦飛雖警露，九皋清唳早聞天。
孤山處士還相對，松下風多且避煙。

送解筠賜環東歸

得脫穹廬似脫圍一鞭先著喜公歸白頭到此同休戚青
史憑誰定是非漫道識途仍驥伏都從遵渚羨鴻飛天山
古雪成秋水替浣勞臣短後衣

回首滄溟共淚痕雷霆雨露總君恩魂招精衛曾忘死病
起維摩此告存歧路又歧空有感客中送客轉無言玉堂
應是迴翔地不僅生還入玉門

七夕次嶰筠韻

金風吹老鬢邊絲如此良宵醉豈醉莫說七襄天上事早
空杼柚有誰知

漫道星橋徹夕行漢津波浪恐難平銀潢只見填烏鵲壯
士何年得洗兵

鍼樓高處傍天墀七孔穿成巧不移但恐機絲虛夜月昆

明秋冷漢家池

程恩澤字雲芬號春海歙縣人嘉慶辛未進士改庶吉

士授編修官至戶部侍郎有程侍郎集

詩話春海尊人蘭翹學士乾隆庚子以第三入及第入直上齋宣廟甚重之嘗論春海曰汝父蘭翹先生朕青年最敬共品學聞者歎為異數春海覃研樸學六書訓故九章算術皆好學深思心知其意所寫定者有國策地名考十二卷詩雄深博雅與張度西黃樹齋後先相亞

沈栗仲同年宰鄗縣以絃歌化之邑能鼓雅琴者四

十餘人其治可想以詩贈之

一夫絃歌千室鳴古有單父東武城三代以還無此聲此聲能使王侯貞閒暇無事修太平化我鷗梟哺所生雲秋之水北入洙上有神父秉周禮攬深醪愉萬事理偶欲登高臨淥水諸生十百希厥旨路人咸詫問所以指絲桐曰

命之矣茆厂夜月彈流泉杼聲書聲相糾纏稍涉北鄙便
自愧何況洙泗斷斷焉邦君憑軒廣古篇邦人和之如衆
仙趣拜炎陵求練絃翦其青牛剉雙角夔襄薦技班倕鏞
神農大笑投豬鞭此調不傳數千年恨君不識袁孝尼恨
我不識元魯山于爲于曲已徧誦廣陵妙散胡可慳不成
章我亦不作但欲博我高堂歡進觀君藝何媮媮能詩書
畫奕劍丸所可測者器數間不可測者海波瀾廿年同舉
今甫面冰雪同清鐵同鍊惜惜琴德美可眷君山豈受宣
平薦五技都窮卧花縣何當密友羅曲宴三疊胎仙舞深
院座中那有鍾子期祇有軒駒側冠弁

西平道中

刺促成何事差池不可齊功名上蔡犬歲月汝南雞種種

憐秋鬢紛紛憫夏畦誰歟佩霜劍淬礪向棠谿

戊子八月十四夜偕祁春浦中允昆明湖踏月

秋生玉宇瓊樓夜月在長楊五柞間黑處樹陰明處水紅
皆臺影碧皆山幾年官耐侵銅斗一日春雷響獸環似此
蕭閒仍富豔何勞清夢戀江關

題郎海西畫馬

吾聞天馬不受絆誰歟操此青絲韁拂耳頓足三萬里草
頭一點西風長絕其芻豆儻能走世豈復有豢龍手玉鑲
金鍍朱排沫一戰功成骨先朽伯樂不及支公癖放與逍
遙噉春碧汗血全乾四蹶重不使銀鞍覆虎脊得無罽駕
更齧膝致令畫者三擲筆畫者乃今曹將軍能通馬語取
馬神飄飄尾鬣堆若雲蓄怒未許奚官馴猛士掣之力不

均祇恐繩絕飛且奔海西所畫已難得何況騏驎出西極
君不見騏驎出西極又言在德不在力

雨盛不果游燕子磯次楊子堅韻

江干青楓化爲霞秋水以外皆春花中有一磯挂林杪道
是銀漢飛來槎撐突萬古礙星月嘯呼六代爭龍蛇峭壁
垂雲幻錦繡叢檣似戟紛杈枒搖搖幢風佛倚閣渺渺蘆
雪鴻爲家昔游正值夏綠裏時有好鳥銜餘葩今偕詩仙
蠟雙屐先喚漁父同杖拏誰知冷雨鎖荒寂三日都打迴
風過澃澃燕尾不可見攝山一角沈天涯詩仙不到山不
綠得無象車不受誇君乎琢句苔石破我亦題竹風鴉斜

沈陰

沈陰不散地理憂冷雨三旬苦未休幸不侵陵農事晚已

難消受。旅人愁蘆花。涇處哀鴻泣。蕉炬炎時凍。雀投卻詔。
北風如虎怒。盡吹清淚落南州。

漸冉

漸冉春如許。輕寒勒不歸。風隨錫笛轉。月傍紙鸞飛。奇石
無一語。喬松今十圍。九衢燈火夜。衰病夢魂非。

游寶藏寺清涼厂

兩峯忽破處。一榭明以敞。虛無盡齊一。萬綠與天盪。高樓
出頭角。圓水畫盆盎。塔影隨煙細。城齒齧雲上。九重連萬
井。五色日晃服。慶霄龍虎氣。人定自來往。天苑幾處羅瓊
樹。夾金榜。靈風山背至。盛夏萃森爽。雪泉與月夕。清景勞
夢想。誰將千里目。舒卷一指掌。憑高豈不快。望遠欠之悅。
見牛不見曉。離朱同象罔。三歎返幽寂。鐘魚正交響。

蔣立鏞字笙陔天門人嘉慶辛未一甲一名進士授修撰

登岳陽樓

洞庭波起夕陽浮縱目層樓亦壯游鴻雁聲隨天共遠魚龍氣與水爭流神仙有約今朝醉詞賦無靈終古留如此長風當破浪蒼茫萬里是歸舟

徐謙字白舫廣豐人嘉慶辛未進士改庶吉士授吏部

主事有悟雪樓詩存

詩話白舫詩境清逸得嚴澹澗之旨專從悟入猶竹垞品揚夢山詩如水仙十囊江梅一萼嫣然於薄冰殘雪之外王霞九題其詩集云彈指華嚴縹緲問瓊樓百尺絕躋攀此中詩境何人悟月滿寒江雪滿山

古松歌

我醉夢騎蒼虬飛飛雲如蓋隨翠旂鱗鬣怒張寒凜肌緣

雪片片沾我衣乍聞謾謾天風急俄見茫茫海潮立白虎
瘡口荒谷奔青兕攝魂深隧泣松下乍醒錯愕久突兀眼
前勢猶走乃悟神物百霄守孕胚元氣天未剖此老神完
人罕知空山與我同支離

重過時帆先生詩龕

詩龕我三至相逢始辛未乍見索詩讀許我玉堂吏草草
功名馬耳風憐才誰與古人同再到詩龕唁公子同年桂
一山官
舍人摩詰已去藍田空龕中一瓣香韋柳儲孟王中坐柴桑
叟詩境森清蒼潭上落花流水逝泉臺又灑西河淚斜日
松陰滿舊龕幾人門下哭羊曇

遙夕

雨霽月彌靜無人共遙夕亂蛩風露寒虛堂入秋色

黃玉衡字伯璣一字小舟號在庵廣東順德人嘉慶辛

未進士歷官御史有安心竟齋詩集

詩話虛舟當乾隆中與張葑房黎二樵呂石駟稱儲南四家在庵詩學受自庭訓復早歲通籍與當世文章鉅公遊學識益上詩辨香坡翁古體或閱肆情蒼或冲澹窈峭或沈鬱排冪逼近杜韓近體則雅潤爲本清麗居宗粵中詩人父子濟美者首推黃氏云

過呂子羽上舍樂潛山莊

南郭行吟去江天月一痕
清秋何處笛紅葉幾家村
雪氣涼生袂溪聲曲到門
主人迎我笑畫理得深論

早行

滿天寒鴈語空冥
喚起征人夢半醒
城上柝聲催落月
村邊燈火亂殘星
相羊歧路風憐目
歷鹿單車影答形
今夕又從何處宿
出門先問幾郵亭

濂泉寺

陰森巉層崖窅窳列峻陞溟溟亂雲合豁豁蒼壁啟巖泉
散珠簾山骨濯天醴初從月窟落漸與山根抵高下紛奔
騰漣漪自傳遞巨石古雪寒怒湍青兕觥坐卧時俯流坦
率偶露髀小魚見人影潛身伏石底藻腳長如繩霜根清
若洗薄遊空道心爽氣豁塵眯及此半日間不負山僧僉
振衣下坡陔歸路風泚泚

蒲澗寺

我身如浮萍江湖久浪跡我心如定僧溪山自耽寂頗聞
蒲澗境幽僻似疇昔勞勞塵網牽數載靳登陟挈伴偶然
至踏遍苔蘚碧古木荒煙屯懸泉皓雪積諸峯淡欲無萬
籟暗猶激孤鶴飄然來對我如舊識仙草不留根靈風迴

絕壁石紋延遠綠松陰翳微黑不知藤蘿中雲散滿山白
徒倚神忽超吟嘯機漸息安得從安期乞我萬古宅

晚晴

雨氣淨羣綠花香霏一庭清甌浮淡月涼几卧繁星鎧影
獨搖碧蟲聲深隱青明朝擬聯騎霽景眺江亭

雨中招同人重集寓齋用香鑊雨中偶成韻

曉起巡簷鳥語稀溼煙籠處菓初肥荔牆痕滑蝸斜旋花
院香沈蝶懶飛出逕浮青雙屐淨小窗橫翠一峯微所欣
濁酒尋常有舊侶論詩約不違

馮元錫字紫屏江蘇通州人嘉慶辛未進士改庶吉士
歷官御史有馮侍御遺藁

臨平舟中

一帶莎隄疊石斜，傍峯臨水有人家。
舊園屋壁多編竹，新闢山田爲種茶。
岸闊輕帆同鳥疾，林深高寺有雲遮。
扁舟領略汀洲趣，閒看蜻蜓集藕花。

湯儲璠字茗孫，臨川人。嘉慶辛未進士，官內閣中書。有

布帆無恙草，忍冬小草長秋館詠史詩鈔。

詩話茗孫受知於曹文正公，官中書十年，進奉文字及牋牒表奏，多出其手，詩能達意，有宜僚弄丸之妙。咸豐丙辰，粵匪之亂，全橐散失，其布帆無恙草，忍冬小草皆罷官後四年中所作。

天津晚泊答謙齋太守

落日滿沙渚，北風吹暮濤。
人隨津樹遠，秋入海天高。
詩酒供多病，星霜感二毛。
使君憐舊好，存問到江皋。

晚泊

煙波不知處，一櫂寄江濱。
夜火明紅葉，秋風長白蘋。
蟲聲

都在水鷗夢慣依人日暮多歧路何勞更問津

送秋

送春猶可過送秋將奈何我於春風苦無分惟秋與我同
輒軻而今并此舍之去吁嗟吾意其蹉跎卽今眼前論離
別我是主人秋是客我生况無百年身秋還作主我作賓
非人送秋秋送人

花天狂豔不可當秋風一掃生清光涼月娟娟出海嶠不
照繁華照枯槁古來惟有楚大夫不識此時風月好登山
臨水發悲歌先生感慨何其多遂令金天少顏色吁嗟秋
兮奈爾何

我今飄泊何所成扣船但欲爲商聲惟有秋風不世情昨
來江上相和鳴落葉哀蟬亦歎息遭臣妾婦皆涕零此時

月白霜露清我心所感猶和平但愁過此多冰雪其聲凜
栗難爲聽

采石岡懷古

采石嶙峋翠接天江流到此欲迴旋六朝歌艦爭姑熟萬
古艤船醉謫仙此去金陵纔百里我懷明月已千年英雄
馬槩詩人筆一樣湮淪付暮煙

讀梅宛陵詩集書後

二百年來無此作宰相亦知公能詩何不薦公立廊廟粗
官垂老猶苦饑平生知己一永叔謂公詩爲雅頌遺何不
薦公使秉筆爲公作敘徒歔歔或疑造物有成例以韓匹
歐郊况梅郊也苦寒已如此公欲無窮安得辭當日公卿
不知惜卽今宛水猶相思景梅一亭萬夫望恨不起公歌

竹枝

人謂詩以窮而工我謂工詩而後窮自古詩人多富貴雅
頌作者何雍容閒有孤生一枝筆不與羣雅相和同驅使
神鬼出奇怪雕刻造化開屯蒙江山涕泣訴真宰恐千萬
年無鴻濛然後帝乃降薄罰捐除祿命稱詩雄使公稍能
自貶損登之館閣聲隆隆公乃愛窮死不悔君相欲福難
爲功嗚呼大雅久淪喪齊鳴瓦缶輕黃鐘江河賴此爲砥
柱倒障狂瀾使勿東萬歲千秋有述作何須與世問窮通

李彥章字蘭卿侯官人嘉慶辛未進士內閣中書歷官

山東鹽運使有榕園詩集

詩話蘭卿與兄彥彬俱以詩名有雙珠之目官揚州
日於蜀岡桃花庵旁建宋三公祠祀韓忠獻歐蘇兩
文忠復於祠之西取漁洋詩話作載酒堂祠前蒔垂
柳百株作亭其中曰補柳亭以存歐陽遺澤流連觴

詠極一時之盛蘭卿受詩學於翁覃谿然情婉
流逸不盡守蘇齋矩矱固嘉道中一作手也

寓齋陰寒殊有雪意催之以詩疊用東坡清虛堂韻
月離於箕風揚沙今朝休沐歸早衙枯天欲雪雁聲急禁
寒勒住新梅花圍爐促坐自瑟縮似有畫本誇燕家濃陰
如墨倒斜翠凍雲密沍扶桑鴉不知天公有意無幻出璀
璨照水葩苦吟壘塊自傾吐意所到處皆搜爬擬傾折腳
煮寒玉無慘狂態今顛茶銷寒忽忽過四九太平街鼓無
停過一冬近已見三白占年田父休咨嗟玉龍聞此當起
舞有酒且醉蓉城霞

酒名王逢詩憶攜蓉
城霞醉賞君山雪

夏日寓齋雜詩

伏暑沈熒急浮塵隙景忙龍胡飛雨斷蟬語別枝長涼月
懷人引紅雲苦熱行忽催鄉思起一枕落滄浪

日身言部卷一十一
二二二
二二
稽爛迂成癖銷閒強讀書過門今雨熟操縵舊琴疏翰墨
緣都合浮沈習未除承明慚寂寞誰問子雲居

衆物欣有託高齋空復情孤花澹涼意萬綠助詩聲篆縷
和雲冷簾陰到地平安心應有訣罽暑愧時名

氣節尊吾道傳倫念索居雲知親舍近月似客懷疏兄弟
多時別江湖一紙書惟將健餐飯辛苦付雙魚

暇日容懷古千秋俯仰同聲名羞鬪蟻篆刻薄雕蟲馬骨
終知己蛾眉失畫工欲論今古意天問答應窮

處俗櫻塵慮齋心玩物華錯刀人意重長劍壯懷加舊夢
吹涼葉新泥種小花我心自虛白何處契琳霞

安仁谿口

罨畫人家繞小谿滿林風露壓篷低秋江記得停舟處斜

日梢頭橄欖梯安仁籓橄欖最美甲戌九月過此見村人新摘就船食之甚甘俗以梯之窄而長者爲梯

朱壬林字禮卿號小雲平湖人嘉慶辛未進士歷官直隸清河道有小雲廬詩稟刪存

文德關

昨行焦谿山險窄懷不暢今朝境一變山山插天壯曲棧紛鉤連危梯絕依傍前行奮先登後者從下望意謂攀躋難瞥已層霄上人馬一髮懸此景極飄颻雄關踞崖巔屹立森相向羅甸此咽喉黔滇亦屏障天門闕闔開雲光鎮摩盪會當躡飛仙振衣發高唱

中宿峽

帝子昔采竹遠游茲棲遯芙蓉對面青白雲飛不盡喬松

經千霜蟠株覆層猿磴風中開鶴巢煙際隱琤琮一斛
珠天半瀉虛牝迅波走不停混涵接海蜃到此始一束造
化巧樞樾山空樵響答日落鶻聲緊望望飛來寺晚靄松
門晚

舟行書懷

鄉近翻愁遠張颿向夕征荒汀孤雁下獨樹亂鴉爭見月
渺離思繙書多古情寸心將母切何計慰歸耕

王贈芳字霞九廬陵人嘉慶辛未進士改庶吉士授編
修歷官雲南鹽法道署按察使有慎其餘齋詩集

聞蟬

驛騎人行倦吟懷託野蟬密林新雨後古戍夕陽天沉澗
辭塵濁蛸蠖得氣先立秋纔昨日便爾換商絃

楊兆璜字古生邵武人嘉慶辛未進士歷官廣平知府
有東霞山館詩鈔

昭州夜泊有懷又伯通守

亭荒點翠碧粼粼紅蓼花疎間白蘋官罷野鷗能傲我詩
成青嶂苦隨人偶看明月成千里孤負黃金笑一身得失
雞蟲知許事玉盤堆趁荔枝新

秦淮餞春

杜鵑聲裏渺天涯爭似征夫不憶家
皺面自憐前度客成陰無那舊時花
悄悄水閣風初緩黯黯江城日易斜
開徧鼠姑飛盡絮令人回首惜年華

廖文錦字雲初嘉定人嘉慶辛未進士改庶吉士授編
修歷官衛輝知府有佳想軒詩鈔

遊泰山

浮嵐撥翠鬱岩巖壁立丹梯倚絳霄千里暮煙齊魯坼半
空香霧鬼神朝星巖月觀誰開闢玉几金牀久寂寥欲訪
安期何處所獨騎鸞背自吹簫

彭城懷古

芒碭雲寒白日沈猶聞父老說淮陰一生誤相君之背九
死難明臣此心烹狗早知千古恨釣魚悔不五湖深囊沙
背水渾閒事贏得功成漂母金

力除狼虎氣吞羸膽落諸侯壁上兵千古大觀三月火半
生小忍一杯羹難消帳下歌姬恨不受江東子弟情十丈
靈旗陰白晝猶聞叱咤大風聲

劉珊字海樹號介純漢川人嘉慶辛未進士歷官潁州

知府有亦政堂詩集

白蓼花

到眼西風醒斜陽認有無秋心濃不得水國淡相須破艇
梢雲淺寒鳧抱雪雁更誰覓孤賞淒絕對江湖

秋歸

秋色忽如此門前落葉深蹉跎游子恨慰藉老親心新雨
蟬聲足斜陽雁影沈不應怨遲暮流水自鳴琴

折柳枝詞

青青隄上隔征塵折取新枝贈遠人亦解長條羈不住要
君知是故園春

漢宮求仙謠

五柞深宮夜乞靈冰函瑤笈費丁甯穆王池上西王母又

控青鸞下漢廷

傅潢字星北一字小泉貴筑人嘉慶辛未進士歷官全

州知州有一朵山房詩集

詩話星北爲青餘方伯尊人居鄉主講席多所成就黃子壽方伯卽其再傳弟子歷宰畿輔及粵西關懷民瘼時見篇中詩亦莊雅可論

謁陸象山先生祠

崇祠孤湧萬峯裏白晝冥冥亂煙鎖客行畏溼此少休茶
竈松房安插妥圖書萬卷藏何處但見靈臺一寸炬靜坐
不覺身墮空乾坤儼另闢門戶偶噎何至並食棄勿怪紛
紛來羣議雖有功臣如姚江已成鐵案難翻異大江東去
路日苦泥陷沙沈詎堪數果得惺惺常此居亦勝荒蕪一
片土

出郊行

一身奔走輕於鷲偶爾在衙常在路癡牀無夢厨有脚軒
裳黠淡泥塗污出郊一村復一村一向未屆幾回住平生
本愛農家好偏教此時親此務菽麥瑣事喋喋謀水來同
捍蝗同捕窮黎見慣忘官尊視作家人苦具訴孤嶺日斜
古祠坐僮僕眠雲馬繫樹夜來蛙聲滿山窗公然吏被神
仙誤米鹽料理委妻孥客來主出易應付獨餘一事終歉
然庭閒一日牒無數

感事

萬政此官始一身民命依獨絃成響細寸木稟材微悍鷲
攢岑隱噉鴻繞筋飛專心事翦滅總與病根違

王衍梅字律芳又字笠舫會稽人嘉慶辛未進士官武

宣知縣有綠雪堂遺集

詩話笠舫性高曠嗜酒工詩嘗謁戴山掌教陳太守
廷慶適有饒江瑤柱者曰子能用饒字韻賦此者當
烹以酌子因押全韻成詩其警句云升沈一柱觀闔
關兩當衫太守歎爲絕唱遂奉觴以酬之少受知於
阮文達公罷官後文達招入幕府仍以詩酒自娛爲
紅杏村人傳以見志越中士女言其佚事無異青藤
曉行風月涼甚

涼風吹客夢沙月導人行驅馬已十里荒雞纔一聲旅懷
無旦晚郵店有逢迎卻望滄州路冥冥煙霧生

曉起過槿園

睡覺翻階鳥雀喧遠拖吟屐過江邨禾收大野全成路雪
霽遙山盡到門春蚓怒號茶鼎熟凍蛟狂裂墨池渾看他
黃葉風如掃籬畔梅花白幾痕

虔州野泊

渺渺西風蘆荻洲。崆峒雲物望中收。一天殘照生鴉背。滿
目青山畫虎頭。八九人煙依竹住。兩三漁火雜螢流。鬱孤
臺畔清砧月。重唱刀鐮鬢已秋。

題二樹山人畫雙角石

橫峯側嶺巧相兼。喚取鴉叉展畫簾。南渡關山慙一角。北
臺風雪看雙尖。梁家婢可明珠換。講舍兒須錦髻添。詩老
凋零餘墨在。梅花僧印尙紅鈐。

林元英字弁瀛。閩縣人。嘉慶辛未進士官。上高知縣。有
漱石齋吟草。

冬夜檢書寒氣逼人作此自遣

文史三冬足。澄懷卓犖觀。千秋列眉睫。方寸起波瀾。人定
地疑僻。夜深鐙亦寒。不妨北風勁。容膝易爲安。

尹作翰字叔藻一字吉生湘潭人嘉慶辛未進士官桐城知縣有知如精室詩集

白鶴峯

瑞靄接龍眠空濛騰紫煙一隄環水碧三面枕山圓樹杪撐樓閣峯腰種稻田竟思騎鶴去把臂學飛仙

吳衡照字夏治號子律海寧人嘉慶辛未進士官金華教授有辛卯生詩

詩話子律論詩以白石遺山青邱爲宗其冬夜讀詩十五首評泊梅邨以次亦皆允振茲體遠溯裕之近踵賡上名家集中往往而有固詩事之要刪見尙論之微旨已

宿韞光庵

縱步蹴烏脊驚迴幽篁鳴卻顧所歷徑一步一崢嶸陰崖白日晃倒射兩睫青樂此深山中泉水長泠泠何不向石

室調琴和松聲松聲與琴聲併入泉聲聽人間靜住福孰
與蘭奢爭蒼然巢枸隴日暮愁攀登

遊南山

一洞豁然敞一洞窈然曲愁猿不敢嘯倒挂白蝙蝠日色
秋蒼涼餘映散巖谷混沌鑿不死妙手剗其腹中空嵌玲
瓏亂點莓苔綠我來白雲飛我去白雲宿一我一白雲都
在石佛目南山勝絕處煙霞與石屋一洞泉涓涓遺聲聽
水樂

入雲栖隴

江水流不到崖根裊成路竹葉陰深沈鳴禽叫嘯赴自爲
小村落安禪結茅住土室蝸曲盤香龕燕分護空際落疎
鐘冷翠颯如注泉響四圍答經聲出高樹手把青松枝招

提澹容與僧雛不解事開窗放雲去

竹筧

斷竹復續竹通水妙用筧我行入山中清泉正迤衍絕似
汞瀉地好在肉貫弗奚翅符半剖橫陳界翠巘銜尾接奔
赴剝節縱流轉迴合曲鬪筧層折迭導窾吞納既汨汨疏
引但宛宛俯注承以仰近給供自遠初疑內外蛇鬪罷互
息偃豈意調水法盡頭各彌滿智笑輓輓拙力患桔槔短
晝夜響不停天機信非淺鉤連灌庖福恰稱高僧嬾儻然
變作酒便當碧筒卷

歸安學署訪端木鶴田園

輕舟偶來訪學舍小於舟相見忽相笑一官冷不休鷗波
亭子地遺蹟擅風流買醉看山去狂歌天地秋

朝日盪湖水蓬蓬生遠煙煙波渺窟宅杳靄青林閒道場
一峯秀翠撲籃輿前何年與坡老同坐挹飛泉

由淳安入歙

羣峭摩天立青圍一水流沙垠潛闢路石罅窄通舟碓急
爭風曉灘危挾雨秋險夷隨上下那得比浮鷗

秋過濟南與舍弟子校乙照同遊大明湖越五日而

別

秋柳題痕二百年祇今湖水碧於煙詩人一代斜陽外間
煞亭西弄笛船

湖邊竹木隱層巒好是湖光向晚看回首一行南去雁月
明天遠不勝寒

鮑廷博字以文一字淥飲錢塘籍歙縣人諸生嘉慶癸

酉賜舉人有花韻軒詠物詩存

阮芸臺日以文少有詩癖蒐羅繁富凡古人之長箋
小疏謂言賸語一掌錄中朝開四庫館進書至七
百種名動當寧因刻知不足齋叢書二十餘集中年
後尤耽吟諷杖笠所至一草一木流連竟日又曰
以文嘗爲夕陽詩盛傳於時人呼爲鮑夕陽余贈以
句云清名卽是長生訣當世應無未見書何處見君
常覓句小闕
干外夕陽疏

夕陽

一市人間夕又朝晚來依舊滿閒寮疏分霜葉秋容淡細
點征帆別思遙澹澹欲隨城角盡明明還帶酒旗飄迷藏
憤匿西樓影不似春愁不肯銷

底事人間重晚晴當樓殘照最關情百年身世霜鴻影萬
里江山畫角聲征馬雲邊驅轉急歸舟天際望偏明倚闌
無限蒼涼意費盡閒心寫得成

曹宗瀚字嵐樵蘭儀人嘉慶癸酉舉人刑部主事歷官
給事中有證味齋詩存

過陶子愚故居

應劉傷逝後重過此園林曲徑午煙寂閒庭秋草深花含
今雨淚松牋歲寒心何必山陽笛思君幾度吟

漁洋山人墓

濟南名士冢下馬拜斜陽人物東西晉詩情中晚唐一杯
淒草色斗酒醉花香雅道久淪喪斯人未可忘

邵淵耀字虛友昭文人嘉慶癸酉舉人官國子監學錄
有金粟山樓詩集

秦淮秋泛

行過丁簾蕩槩遲曉波新漲綠漪漪幾分春恨因桃葉一

半秋心在柳枝臨水樓臺珠箔捲教歌院落玉簫吹鳥聲
花影都如夢刻意眞憐杜牧之

春晚

不覺春光老沈冥任索居詩情微雨後酒病落花初避地
愁聞鶴貪眠偶枕書抗心千載上古處定何如

興福寺

梵宮岑蔚處齊梁樹猶綠餐勝常如新逢景不嫌熟西原
泉石佳一賞亦云足空潭已非昔亭外鞋紅簇車馬爲喧
闐焉能媚幽獨人誇富貴花我愛蕭疏竹

楊庚字少白一字星山江安人嘉慶癸酉舉人歷官湖
北漢黃德道有星山詩草

詩話少白桐雲閣試帖詩爲七家之一又入後九家
前人評其試帖謂題中每字皆以四面取之順天鄉

闡大田多稼詩傳誦於時
其古近體詩幾無人知之

由沙陽舟行至樊城

不是峽中路奇雲何處生
帆收沙岸白月入酒杯明
有樹詩情遠無山畫意平
水窗殘暑退緩緩上樊城

將赴易州晚出都門度蘆溝途中作

長河水落古桑乾
匹馬來過日已殘
五里風沙新店近
一更霜柝暮天寒
荒雲似岫當頭列
禿樹疑人對面看
于役有期遲不得
兼程待曉趣征鞍

新秋雨後遊龍樹寺登看山閣小飲

城南煙樹鬱蒼蒼
難得新秋又早涼
邀客不辭來細雨
留人偏好趁斜陽
樓頭簾捲山如畫
籬角花開酒亦香
我輩偶閒拌一醉
歸心莫共嶺雲忙

德宣字子浚號西礪漢軍旗人嘉慶癸酉舉人官江陰

知縣有西礪集

詩話子浚少耽詩窮覽衆家確知其得失於時俗好尚概不屑意已而盡棄少作歸諸澹簡渺栗識既卓鍊氣能輔之同時武進李申耆甚重其詩爲刊遺藁

秋日偶過西山

幾日酒樽滿不知秋已深出門隨雁影巉壁氣蕭森
遠水明孤棹寒煙接斷林忽驚霜際月樵徑散微陰

官舍積數石削方矧磽空靈有態日夕吏散俯仰石

側與石旣習遂得爲詩

陰陽陶乾坤堅氣餘作石孕精全介貞嶷然標挺特側茲
掾史庭正彼太古色卓爾標磊落天然著雕飾妙因剛健
姿作諸林壑式穴空窺虛明文燿晰折孽枯藤纏老梅時

共瀉瑤碧客生幾歲華偶與石捫陟摩挲屬賞心幽冷契
休息元化泯凋謝不朽殊動植卻思泡幻身朱顏亦易歇
殫慮抒幽光肆志保潛德夫惟哲士名終古仰珪璧

梁元字一峯廣東三水人嘉慶癸酉舉人官瑞安知縣
有毋自欺齋詩略

清遠峽

一水偪仄去兩山高插天雲移林忽斷樹迴日低懸猛虎
窺行客寒猿咽澗泉殘鐘來古寺旅夢淡於禪

和曾賓谷方孝伯游光孝寺韻

鐘聲百八出疎寮霸業睜巉轉瞬銷宮闕何年開法剎河
山終古咽寒潮光搖珠海東西塔夢斷羅浮上下橋欲覓
南能論興廢菩提葉落影蕭蕭

十八灘卽景

宿雨全收日正晴微風不動碧波平舟從石罅盤旋去人
向山腰宛轉行幾曲煙村橫酒旆一江雲樹曳蟬聲客中
飽食渾無事卧聽灘濤數驛程

管貽胙字樹荃陽湖人嘉慶癸酉舉人官固始知縣有
裁物象齋詩鈔

渡河

輕舟又泝浪花堆無恙征帆趁曉開霜氣白隨朝日斂沙
痕黃挾怒濤回魚龍尙切三秋警壁馬誰消萬古災笑向
長年數陳迹十三度記問津來

陳僅字餘山鄞縣人嘉慶癸酉舉人官安康知縣有繼
雅堂集

周伯恬曰餘山作合十餘年皆瘠苦地嘯歌自得靜
謔安雅委婉周至深合古詩人之意
吳仲倫曰才
足抗衡宋元大家而入律細謹寄託
遙深無不合於唐人不蹈宋元流弊

卑栖

面面雲峯好荒衙置此間吏人隨鳥集賓友訪僧還水氣
石邊靜松聲風外閒卑栖吾自足猶勝買青山

和王萊園少尉送別韻

莫訝清霜兩鬢斑蒼生疴癢苦相關晨星讞牘昏搜霧春
雨開荒瘦勵山直道敢忘三代後虛懷難滿十年間多君
尙記相從日冰雪襟期洽往還

王蔭槐字子和一字味蘭盱眙人嘉慶癸酉舉人大挑
教職有蟻廬詩鈔

詩話子和世居丹徒江洲與王柳村同鄉里並有詩
名時稱江左二王其父僑居盱眙遂往籍焉晚有目

疾不仕陶文毅於洪澤湖治水軍舟泊龜山賦詩紀
游屬和者數百人獨許子和爲詩人爲序其集目廢
後吟詠不輟江淮間推爲老宿王笠舫贈詩云遙憶
僧伽塔斜通揚子津大江幾名士同姓半詩人伯鳴
聞來往青山相隱淪前村有紅樹歸詠故園
春野胎王子願江孟棠皆能詩與唱和者
雨後同孟棠孝廉夜登玻璃泉清心亭

三秋積雨多客夜聽泉至溟濛峭峯頂疎林恆雲氣秉燭
照迴廊古徑壓空翠西風吹高巖打頭亂葉墜長淮寂漁
火暗聽驚濤沸萬瓦黑甜中一鐙隱湖寺茲地數登覽夜
景領尤異烹泉話石欄眼前獲新契亭名玩清心澄澈平
旦意何用警霜鐘靜理悟禪諦

崑山過顧亭林先生故里

郡國關心利病陳玉山遺老負經綸河汾弟子興唐室遼
海先生自漢民落日荒陵揮涕淚征車斷碣訪荆榛高門

宅相都零落故里經過感替人

焦山放歌懷子頤並寄柳村徵君

濃雲一片浮空來鬱律萬古青不開東風料峭布帆送到
眼倏忽驚樓臺海門東去波接天一拳突兀洪濤閒長江
泱泱望不極萬里一碧流春煙陰崖百丈暗松柏石磴盤
盤入空碧絕頂高翻鶴鶴巢天風冷冷生兩腋丈夫不合
庵市廛不能富貴還學仙桃花洞口笑相識白雲待我三
千年肩拍華陽隱袂挹焦孝然驂鸞駕鵠任所往安得復
有人世摧輪折轂之險相憂煎我家杜若洲邊住咫尺蓬
萊屢回顧風塵傾洞損朱顏十年悔不攜遊具山僧導我
深篁行指點斜陽作晚晴沙邊白鳥一雙起江天絢爛朱
霞明琅琅淨玉鐘鬱鬱瓜州樹風潮窅冥援孤琴松聲戀

客不能去故人曾吹鐵笛來磨崖好句驚仙才西風何意
遽吹返嗟哉抑塞塵與埃種竹翁元眞子相望盈盈隔江
水金丹悟道卧元關天子蒲輪徵不起虛堂明月照清輝
魚龍寂寂春星低幽懷夢繞江南北瀛海茫茫獨鶴飛

雪後寄子頤

徑僻隨鴉步亭高俯雁羣風迴陡山雪天暗女湖雲轉漕
紆時策防河異昔聞美人寒倚竹空谷欲何云

自盱眙至金陵道中作

秋風吹桂樹驛路飄清香淮山一夜雨霽色催晨裝寥泩
天宇高新雁爭先行倦眼盼晴雲老鶻亦高翔野人衣食
謀所樂惟稻粱江淮盛夏漲流冗良可傷高原幸有秋如
雲罷亞黃旅食勿云貴且復歌金穰

暮宿蓮塘雲曉策金山蹇鄉音雖漸改百里未云遠西風
阡陌涼亭午日猶暝野店帶溪橋鷺鷥亂情淺擔夫柳陰
卧行子荻棚飯蕭蕭草露白牛羊下遙坂前路問耕夫煙
中指候館

江流何呼洶浮梁風動搖解裝古棠邑落日輕舸水痕
漲初落木杪懸菱菱鬢紫鬚垂乃長枯楊腰十室九空
壁野風吹屋茅目擊實可慘况聞千里遙明月照溶瀉瓜
山浮一瓢熒熒葦間火疑有驚魂嗥此鄉稱膏腴天吳偶
肆驕哀鴻盍歸來春麥亟荷鋤回首望吾鄉五壩頻增高
嗟哉濱淮田歲歲沈波濤

晚渡錢塘江

羅刹江聲殷似雷扁舟搖兀怒濤堆身從大地孤鷗泛潮

挾羣山萬馬來南渡衣冠秋草寂西陵鼓角夕陽哀古懷
牢落眞無賴呼取餘杭酒一杯

曹元詢初名業字靈懸安邱人嘉慶癸酉舉人道光初
舉孝廉方正有蘿月山房集

壽佛寺寓居卽事

兀兀惟影對悽悽寒夜心疎鐘殘夢覺古殿一鐙深松雨
滴還歇紙窗晴更陰由來車馬客誰肯此相尋

懷范鏡秋

西風與落葉無處不紛紛照影臨寒水看山隔暮雲夕陽
明遠寺古路入荒墳杜若行堪把因之轉憶君

料得南游客於今欲白頭好爲將母計莫惜折腰愁遠道
偏多雨懷人畏及秋那知故鄉客十月未披裘

絕句

雞鳴窗欲白無計留君住縱使後當來何如今不去

楊昌光字秋笛號花塢湘陰人嘉慶癸酉舉人有芸窗

小草

北行舟中作

誰云白俗與元輕陣馬風檣筆底橫萬里雲煙歸客夢一
天雷雨挾江聲落花有憾眠寒蜨楊柳無心坐曉鶯指點
片帆相接處征途多少別離情

尹尙廉號退谷昆明人嘉慶癸酉舉人有玉案山房詩

鈔

閒居有感

三畝揚雄舊草亭終年獨守太元經酒邀碧海蒼龍勸琴

許青天白鶴聽窗外月明橫桂影座中風冷散蘭馨諸君
誰愛疏狂性贏得柴扉盡日扃

遇同鄉

武陵縣北遇同鄉駐馬迴車怨夕陽兩字平安傳語罷不
知何事淚千行

劉廣禮字德亨號寅甫番禺人嘉慶癸酉舉人有息機
軒詩

江行

江行鎮日作南風湖水漫漫望瑞洪客況不忘驢背上詩
心多在雁聲中二千里計鄉猶遠三百錢沽酒已空一抹
殘霞閃金碧漁家晚飯柁樓紅

王夢庚字槐庭號西躔金華人嘉慶癸酉拔貢歷官四

川川北道有冰壺山房詩鈔

鳳背厓

丹嶂生夕陰晴厓斂紫霧我憇雞頭關先循鳳背步仄徑
穿寒雲石磴莽無數壁立窮躋攀罔敢回首顧微音墮幽
鳥懸根敲古樹霜葉煥九苞蒼茫無定處延緣踞層巔負
然絕比附乘作凌雲翔千仞有餘慕

晚宿夾壩石

登山樹橫嶺度壑泥濺石石險路益紆壩長山轉逼中道
分窪窿流泉詭出沒遙翠寒煙封深綠叢莽積金鴉負斜
暉狡兔散殘雪岸腳雲葉青樹腹燒痕黑伏巒巧障袂懸
崖駭當額林高起夕陰徑曲釀暝色遙佇村煙昏喜點野
火密夾岸鴿鷓嘯近寨狺犬出解轡費踟躕展榻獲寢息

板屋淨客塵遙峯墮明月

中秋同友人待月

勝友良宵列座來高歌誰奏紫雲回十分秋色遲明月萬
派江聲落酒杯風力冷侵梧葉老露痕香逼桂花開銀河
隱約星光閃絃管樓頭著意催

松化石

蒼髯擎空卧雲起支離返寂含精髓龍鱗化盡三千年五
花壁立濤聲死延真觀老戰風雨自然道人頻屈指摩挲
瘦骨敲青銅元鶴歸來斂雙趾崑岡元圃黯無色礫石離
奇景高節

丹陽雲陽驛

撲地楊花歷亂飛津亭暮色認熹微天涯作客行將老江

上尋春半欲歸，隔岸鐘聲穿古樹。長隄鐙影點柴扉，崇邱待訪孫郎碣。聽斷嘯鳥送落暉。

雨度鳳嶺

金烏旋辟斂，雙翼雲衣鋪。絮天光黑蛟宮，縑出冰蠶絲。散作千條萬條密，衝風仄徑緣秋毫。舉頭遠見千峯高，浮青積翠互明滅。勢如昂首將翔翱，橫空半入青天影。幾度天風吹不醒，馬蹏泥滑石磴斜。僮僕驚呼到鳳嶺，蒼茫雨色羣峯連。峻嶺高高尺五天，阿閣九苞澤深霧。虞廷六翮凝朝煙，西岐聖德周羣類。遠聽雝喈鳴聖瑞，我欲披尋丹穴蹤。滿隴溼雲常似醉，溼雲接天山勢崇。兩當流水東復東，衝開峯頂雨絲腳。山鳥一聲斜日紅。

中河寨

寒雲濛空山影溼槎枒老樹萬株直神鞭鞭石石怒飛削
出方城絕四壁萬夫結寨高入雲猿猱臂斷鴻翼折山精
凍死靜白日繡作層層土花碧

宿瓦寺溝

冬山忽如睡巖壑謝春菲雨雪倦行役羸馬慘不肥連朝
歷噴岼早旭迷夕暉山水非不佳所苦筋力微村舍倚山
麓鏡透白板屏心急路轉迂瞑踏行人稀雞犬已高卧羊
牛久來歸終南有茅屋倦念素心違

松谿堡

路入松谿堡懸崖贖古松波光翻石壁竹色護村春雞犬
黃沙曲牛羊碧草茸樵歌空際墮穿出白雲重

史密初名襄齡字梅叔號梅裳濟甯人嘉慶癸酉拔貢

愿官淡水同知有史梅叔詩選

詩話梅叔詩高曠復秀抗心希古五言尤工發端如
云落日山蒼茫超然見嵩岳寸心一迴薄飄風與之
飛日落見千古曠然登高臺皆極警策集爲滿洲文
康所刻文康字鐵仙官駐藏大臣費英文襄孫也

山中作

谷靜一鳥響始知山已深起來視庭戶清松圓午陰何以
朗懷抱山水與鳴琴大文彌外樸至音轉內沈卽理信非
隔所欣良在襟

寄戴山人

草木猶未落客心先已秋秋心將淮水日夜東南流寒空
萬嶂出落日千里浮回首滄海上煙波使我愁

武山峽

亂峽坼全天破石入太古崩雲洩嵌竇滲陰漏時雨中江

東朝昏外劍割寒暑冥冥樹林哀哀叫杜宇野人置屋
高深居避豺虎峽門霾日車見炊始知午巴俗多古風男
女自力苦百錢供客餐肉酒滿尊俎中原甚荒饑物價那
可取所以蜀地粟千船下荆楚惜哉癯瘵多卜居畏水土
遲遲登前途悵悵逐徒旅

自丹陽至吳門過無錫登惠山啜泉愛其清幽返舟

賦此

浮雲度江來飄然帶秋色見山卽戀岫遂如愛山客況茲
嶂嶒深窈窕入幽積蒼崖蕩翠微林光養空碧清氣滿吳
關江城正煙夕蹇蘿挹飛泉依松躡陷跡愛此陵緬新懷
有周旋惜宛若情深人初識已脈脈回首悵峯巒登艫杳
相隔

聞觀察使熊公方受左遷東昌太守爲長歌寄之

亂山鬼鬼雪撲天雲愁樹塞寒無煙大河欲凍不可越路
遙翅短無由前去年遇敵桑弧鳴賊來不近曹陽城交親
欲致范孟博干戈悵阻孫子荆君今汲黯已卧守河東季
布必不久斯饑正躋南山幽維霰難蒙日在菰東北蒼生
今凜冽幸逢堯舜忍決絕但須努力愛黎元莫使絃歌負
稷契

自北固放舟登焦山值雨留松寥閣

長江到海風愈急焦山一點江中立心游脚阻不得前浪
驚人稀舟獨入山根倒浸石磴盤崖有高閣衆峯攢分巖
插谷樓殿出飛鳥不到浮雲端入雲坐閣天蒼蒼樹木叢
雜山悲涼萬里之勢向何處遙空卷入青茫茫忽覺海氣

且日余言及名一十一
三五
變蕭索黑拔溼渤眼前落雲驚雨駭中迷離囂吼龍吟動
山閣僧言古鼎不可窺會奪巨魄神鬼隨端人志士抗高
節至今直氣噴雲雷我聞太息嗟神異梁棟沈沈寒出地
但見白鳥穿青霓大海斜陽散秋氣雄奇恍惚在頃刻生
平快意茲莫測蓬萊出沒必有之攀厓最近此其時

雨

入夜高檐雨孤燈照欲明空堂沈海氣虛閣走江聲但溼
開州路休侵滑縣營何如勞旋後留洗朔方兵

柴關嶺

落日散關色亂雲斜谷風猿嘯青嶂合鳥過一天通石裂
崑崙北江流漢河東遠游動高興山色慰蠶叢

夕雨

危閣懸秋望冥冥氣欲侵風寒山翠落雲定野陰沈虛郭
連江暗孤村冒雨深閉門成夕早獨坐一長吟

望江樓

萬樹爭夔閣千山急劍州我來八月節登此百年樓地逼
巴渝盡天包楚鄧流何堪復吹笛風雨及深秋

閔新字茗香應城人嘉慶癸酉拔貢有雙桂堂集

夔陵游臨江墅

臨江有墅枕江流未上天梯暫舍舟孤塔影遮帆出沒曉
鐘聲斷樹沈浮松關尚閉知僧懶竹徑微吟破客愁莫盼
勝游還入夢招提雖好轍難留

汪漱芳字潤六號柳橋簡州人嘉慶癸酉拔貢有十梧

山房集

秋懷

落葉下庭除涼風被原野四顧何沈寥萬象空瀟灑秋士
例悲秋含淒向誰寫黃菊慘不芳采之不盈把鄰不來二
仲誰與傾三雅秃筆黯無光哦詩亦聊且不辭擁鼻苦所
傷和歌寡明月恰有情徐徐下檐瓦起舞招明月徘徊月
之下月來復月去中庭露華瀉

出棧後寶雞道中作

直放丹梯下碧霄四圍山影瀉如潮石埋沙磧雙輪怒風
入金天萬木驕白鹿難尋官時改黃蛇幾見霸圖消好攀
西嶽蓮花去玉女雲中抗手招

宿迴水鋪是夜風雪交作晨興書店壁以志歲月

罡風吹雪散雲關一片愁心萬壑間賸與行人助行色風

看楊柳雪看山

洪震煊字百里號櫛堂臨海人嘉慶癸酉拔貢有櫛堂

詩鈔

登六和塔

七級鎮江干凌空一倚闌月垂滄海闊想結暮雲寒古越
憑遙指秋潮入壯觀客星高可接將去問嚴灘

孫成彥字廉甫嘉善人嘉慶癸酉優貢官博羅知縣有
小謨觴居詩存

游慧山

深深山寺掩重扉白塔紅亭樹影圍百斛流泉噴細竇一
聲清磬落斜暉攜符調水心難壓著屐游山身未歸遺跡
徧尋桑苧老閒雲伴我已忘機

晚晴移詩匯卷一百二十五終